

■ OPINIUNS

In sguard nov sin l'Italia

Plaun plaun percurschainsa tut las midadas che l'onn 1989 ha manà a noss continent. La gronda manzegna da noss tschientaner, il comunissem, ha pers sia fascinaziun, era sche nus stuain patir anc ditg da sias consequenzas evidentas u zuppadas. In imperi vegl, il russ, e dus stadis artificials naschids il 1918 èn svanids da la charta en paucs onns, e quai per part a paucas uras d'auto dal Grischun. A medem temp è la Belgia vegnida in stadi federal cun trais regiuns autonomas; era la Gronda Bretagna, almain en Scozia ed en l'Irlanda, para da sa sviluppar en quella direcziun. Nua ch'ina partida totalitara regeva avant nov onns, da Tallinn fin da Sofia e Ljubljana, pitg'ins cun insistenza sin la porta da l'Uniun europeica. Ins na sto sa smirvegliar sche quellas midadas pertutgan era in stadi

centralisà, creà en indesch onns (1859–1870), sco tras in miracul, or da la suppressiun radicala da plirs reginams u principadis independents; tant pli che la vita politica e culturala da lez stadi era dominada d'ina ferma partida comunista dapi in mez tschientaner. I sa tracta da l'Italia, in pajais limitrof dal Grischun.

Da las metamorfosas da la cuntrada politica tranter Vaniescha e Turin fa part la fin d'in tabu. L'incumpatibilitad tranter il Nord da l'Italia ed il Sid, cun Roma, en el ravugl d'in medem stadi centralisà, gia daditg evidenta per tgi ch'enconuscheva lez, è vegnida pir ussa in factur politic relevant cun ils success d'in moviment che pretendeva l'autonomia dal Nord.

Quai che succeda en el Vnuost, a Tirau, a Clavenna ed a Com na po betg

ans laschar indifferent. Per chapir quels eveniments dal puntg da vista dals actors, pon ins ussa leger in cudeschet accessibel e stampà bain, cun pliras chartas pli cleras che blers plets*. L'autur dirigia I Quaderni Padani, ina revista autonomista edida a Novara.

Tschertas pretensiuns da l'ovra provocheschan a la reflexiun u a la cuntradiziun; autras pon laschar perplex tgi che legia. Cun lezza ovra encleg'ins pertge che quasi tut las gruppas politicas talianas, era quellas cun ina ferma tradiziun unitara, discurran ussa da federalissem. La dumonda n'è betg pli sch'il stadi talian sa mida en els onns proxims, ma co ch'el sa mida.

Giulio Sobbiola-Caanitz, Ardez

*Gilberto Oneto, *L'invenzione della Padania. La rinascita della comunità più antica d'Europa*. Bergamo (Foedus editore) 1997